

BOSNA I HERCEGOVINA  
FEDERACIJA BOSNE I HERCEGOVINE  
**AGENCIJA ZA NADZOR OSIGURANJA  
FEDERACIJE BOSNE I HERCEGOVINE**  
S A R A J E V O

Na osnovu člana 102. Zakona o dobrovoljnim penzijskim fondovima („Službene novine Federacije“, broj: 104/16), člana 130. Zakona o osiguranju („Službene novine Federacije BiH“, broj: 23/17) i člana 12. Statuta Agencije za nadzor osiguranja Federacije Bosne i Hercegovine („Službene novine Federacije BiH“, broj: 84/17), Stručni savjet Agencije za nadzor osiguranja Federacije BiH, na 16. sjednici održanoj 19. 06. 2018. godine, donosi

PRAVILNIK  
O UVJETIMA ZA OSTVARIVANJE PRAVA NA PENZIJU  
I UVJETIMA I MOGUĆNOSTIMA ZA ISPLATU PENZIJE

I OSNOVNE ODREDBE

Član 1.  
(Predmet)

- (1) Ovim Pravilnikom se propisuju uvjeti za ostvarivanje prava na penziju, te uvjeti i mogućnosti za isplatu penzija na osnovu dobrovoljnog penzijskog osiguranja u skladu sa Zakonom o dobrovoljnim penzijskim fondovima.
- (2) Isplatu penzija u okviru dobrovoljnog penzijskog osiguranja vrši društvo za osiguranje koje ima odobrenje za obavljanje poslova životnog osiguranja izdato od strane Agencije za nadzor osiguranja Federacije Bosne i Hercegovine i ima saglasnost za obavljanje jednog dijela poslova u oblasti dobrovoljne penzije.

II UVJETI ZA OSTVARIVANJE PRAVA NA PENZIJU

Član 2.  
(Uvjeti)

- (1) Član dobrovoljnog penzijskog fonda (u daljem tekstu: član fonda) može redovno ostvariti pravo na penziju najranije s navršenih 58 godina života, podnošenjem pisanog zahtjeva za ostvarivanje prava na penziju.
- (2) Član fonda u zahtjevu iz stava (1) ovoga člana naznačuje način na koji želi ostvariti svoje pravo na isplatu penzije i odabire društvo za osiguranje, a u vezi sa članom 1. stav (2) ovog Pravilnika, koje će mu isplaćivati penziju.

(3) Zahtjev za ostvarivanje prava na penziju iz stava (1) ovoga člana član fonda može podnijeti društvu za upravljanje najranije mjesec dana prije navršenih 58 godina života, nakon čega je društvo dužno osigurati uvjete članu fonda radi ostvarivanja prava na penziju na dan u koji on navršava 58 godina života.

(4) Obrazac zahtjeva je sastavni dio ovog Pravilnika.

### III UVJETI I MOGUĆNOSTI ZA ISPLATU PENZIJE

#### Član 3. ( Ugovor o penziji)

(1) Član fonda sklapa ugovor o penziji s društvom za osiguranje, koje odabere za isplatu penzije u okviru dobrovoljnog penzijskog sistema.

(2) Nakon zaključenja ugovora o penziji iz stava (1) ovoga člana, na lični račun člana fonda, putem kojeg su se uplaćivala sredstva ne mogu se vršiti dodatne uplate u fond.

(3) U slučaju da je nakon zaključenja ugovora o penziji, a do prenosa sredstava člana fonda na društvo za osiguranje, izvršena uplata novčanih sredstava na lični račun člana fonda, društvo za upravljanje je dužno vratiti uplaćena sredstva u nominalnom iznosu, na račun s kojeg je uplata zaprimljena.

#### Član 4. (Prenos sredstava)

(1) Nakon izbora društva za osiguranje radi isplate penzije, iznos sredstava sa računa člana fonda prenijet će se na račun društva za osiguranje radi isplate penzije.

(2) Društvo za upravljanje dužno je izvršiti prenos sredstava iz stava (1) ovoga člana najkasnije peti radni dan nakon zaprimanja zahtjeva člana fonda.

#### Član 5. (Mogućnosti isplate penzije)

(1) Član fonda odabire način isplate penzije.

(2) Isplata penzije može biti:

- a) privremena ili
- b) doživotna.

#### Član 6. ( Vrste penzija )

(1) Društvo za osiguranje koje isplaćuje penziju dužno je ponuditi doživotnu starosnu penziju, privremenu starosnu penziju, promjenljivu penziju sa ili bez djelimične jednokratne isplate.

(2) Privremena starosna penzija je obročna isplata u novcu, koja se isplaćuje korisniku penzije na osnovu ugovora o penziji.

(3) Privremena starosna penzija iz stava (2) ovog člana ne može biti ugovorena na period kraći od pet godina.

(4) Promjenljiva penzija je doživotna odnosno privremena mjesečna isplata u novcu korisniku na osnovu ugovora o penziji, a koja se mijenja u skladu sa kretanjem vrijednosti sredstava tehničkih rezervi namijenjenih isplati ovih penzija.

(5) Djelimična jednokratna isplata je isplata u novcu koju društvo za osiguranje isplaćuje po ugovoru o penziji u visini najviše 30% od ukupno primljene doznake prije njezina umanjenja za naknadu društvu za osiguranje.

Član 7.  
(Zaštita ličnih podataka)

Društvo za osiguranje će s podacima prikupljenim na osnovu ovog Pravilnika postupati u skladu sa zakonom kojim se regulira zaštita ličnih podataka.

IV ZAVRŠNE ODREDBE

Član 8.  
( Stupanje na snagu)

Ovaj Pravilnik stupa na snagu osmoga dana od dana objave u Službenim novinama Federacije Bosne i Hercegovine.

PREDSJEDNIK  
STRUČNOG SAVJETA

mr.sci. Edita Kalajdžić s.r.

Broj: 021-1726-2/18  
Sarajevo, 19. 06. 2018. godine

Zahtjev za prenos sredstava na račun osiguravajućeg društva

1. Ime prezime: \_\_\_\_\_
2. Adresa stanovanja: \_\_\_\_\_
3. Osiguravajuće društvo na čiji račun se prenose sredstva: \_\_\_\_\_
4. Da li želite isplatu dijela sredstava odmah:      DA                                      NE
5. Ukoliko je odgovor DA, navedite koji procenat iznosa prikupljenih sredstava želite, ali ne veći od 30%.  
  
\_\_\_\_\_
6. Koju vrstu penzije želite:
  - i) Doživotnu fiksnu,
  - ii) Doživotnu promjenjivu,
  - iii) Privremenu fiksnu,
  - iv) Privremenu promjenjivu.
7. Ukoliko je odgovor iii) ili iv) odaberite period u godinama, ali ne kraće od 5 na koji želite da se isplaćuje penzija:  
  
\_\_\_\_\_